

**Regional News Unit AIR Aizawl
Wednesday, June 05, 2024**

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Lok sabha inthlan 2024 inthlan vote chhiar zawh takah NDA ten seat 291 la a, Opposition tangrual INDIA bloc ten seat 234 an la bawk.
- Prime Minister Narendra Modia chuan NDA ten a term thum nan sawrkar an siam leh dawn a ti.
- Mizoram-in Lok Sabha-a seat a neih chhuna thu turin Zoram People Movement (ZPM) Candidate Pu Richard Vanlalmangaiha hneh taka thlan tlin a ni.
- Ram dang atanga dan phal loha kuhva lak luh thin chungchangah Home Department chuan hmalakna thar an neih thu an sawi.



VOTE COUNTING

Lok sabha inthlan 2024 inthlan vote chhiar zawh takah NDA ten seat 291 la a, Opposition tangrual INDIA bloc ten seat 234 an la bawk.

Nizan khan Lok Sabha inthlan vote tla te hi chhiar zawh a ni a, Election Commission of India tarlan danin party mala seat la hnem ber chu BJP niin 241 an la a, Congress in dawtin seat 99 an la a ni.

Samajwadi Party in seat 37, TMC in 29, DMK 22, TDP 16, Shiv Sena (UBT) 9, JD (U) 12 leh NCP 8 te an ni.

Candidate langsar zingah Prime Minister leh BJP leader Narendra Modia'n Varanasi ah thlan tlin a ni a, Congress leader Rahul Gandhia chu Rai Bareli leh Wayanand seat ahte thlan tlin a ni.

Party hruaitu tling lo langsar zingah BJP leader leh Union Minister Smriti Irani, Union Minister L. Murugan leh V. Muraleedharan, BJP hruaitu Dr. Tamilisai Soundararajan leh National Conference candidate Omar Abdullah te an ni.



PM

Prime Minister Narendra Modia chuan NDA ten a term thum nan sawrkar an siam leh dawn a ti. Nizana BJP headquarters-a party worker hmaah he thu sawiin Pu Modia chuan mipuiten BJP leh NDA ah rinna an nghat tih a sawi a. Election Commission leh midang inthlan buatsaihnaa thawktute zawng zawng chungah lawmthu a sawi a ni.

Congress President Mallikarjun Kharge chuan kum 2024 Lok Sabha inthlan result chu mipuite leh mipui rorelna democracy tan hnehna ropui a ni a ti. Nimina New Delhia chanchinbumite hmaah he thu hi sawiin Pu Kharge chuan eng party mal mahin sawrkarna siam thei khawpin hnehna an chang lo tih a sawi a. Mipuite duhthlanna chu an pawm tih sawiin CONgress in Bharat Jodo Nyay Yatra chuan mi nuai tel a thlunzawm a ni a ti.

Congress Party senior leader Rahul Gandhi chuan tun tum inthlan chu political party pakhat mai an bitum lo a Agency hrang hrang an tel a ti a. Heng sawrkar hmanruate hi BJP chuan an thunun vek tih sawiin Pu gandhi chuan tun tum inthlan chu ram danpui humhim tura inbeihna a ni a ti bawk..

<><><>

LOK SABHA ELECTION RESULT

Mizoram-in Lok Sabha-a seat a neih chhun hnawh khah nana kumin April ni 19-a vote thlak te boruak muanawm tak hnuaiha chhiar zawh a ni ta a. State-a ro rel lai Zoram People Movement (ZPM) Candidate Pu Richard Vanlalmangaiha chu hneh taka thlan tlin a ni.

Puan tawh angin vote hi nimin zing dar 8 atang khan chhiar tan a ni a. Election Commission of India (ECI)-in a tarlan dan chuan Zoram People's Movement (ZPM) Candidate Pu Richard Vanlalmangaiha hian Vote Nuai 2 Sang 8 leh 552 hmuin thlan tlin a ni a. Amah hnaih bertu MNF Candidate Pu K. Vanlalvena'n Vote Nuai 1 Sing 4 leh 264 a hmu a, anni pahnih inthlahna hi vote 68,288 a ni.

Indian National Congress (INC) Candidate Pu Lalbiakzama'n vote 98,595 a hmu a; Bharatya Janata party (BJP) candidate Pu Vanlalhmuaka'n vote 33,533 a hmu a, Mizoram People's Conference (MPC) candidate Rita Malsawmin' vote 3,793 hmuin Independent Candidate Pu Lalhriatrenga Chhangte in vote 4,706 a hmu a, thlan tur bik hre lo mi 1,866-in NOTA an hmet a ni.

Lok Sabha MP atana thlan tlin ZPM Candidate Pu Richard Vanlalmangaiha'n a beisei aiin vote a hmu tam a ti a, vote inthlahna sang taka thlan tlin a ni chu mipuiten ZPM Sawrkar Pu Lalduhoma kaihhruai an rin zia tilangtu a ni, a ti.

Akashvani Palai nen an inkawmnaah he thu hi sawiin Pu Richard Vanlalmangaiha chuan vote sing 2 vela chak a lo inbeisei laia vote sing 7 dawn laia hnehna a chang chu lawmawm a tih thu a sawi a, mipuiten sawrkar kal lai mek chungah rinna an nghat tih lantirna a ni, a ti a. Hmasawna hrang hrang thawk tura a lo intiam angin theihtawp a chhuah chhunzawm dawn tih sawiin, sawrkar aiawh tur a nih angin Mizoram sorkar chu tha taka thawhpui tur a nih avangin sawrkar laipui lama project theh luh tawhte bawhzui chu a hmalakna hmasa a ni ang, a ti.

Pu Richard Vanlalmangaiha chuan sawrkar laipui chu a thu azira an thlawp tur thu sawiin zawm bik an nei dawn lo, a ti a. Mizoram tana tha turah chuan a rem dan danin thawhpui an tum dawn a ni, a ti bawk.

<><><>

PARTY LEADERS' REACTION TO LS ELECTION RESULT

Chief Minister Pu Lalduhoma'n an party candidate Pu Richard Vanlalmangaiha'n mipui duhsakna dawnga thlan tlin a ni chu lawmawm a tih thu sawiin mipuiten an chungah rinna an nghahzia lantirna a ni, a ti.

He thu hi Vantlang Auhmun-ah sawiin ZPM Leader Pu Lalduhoma chuan Mizoram mipuiin party naupang t'e an ni chungin state-ah sawrkarna an chantir a; MP thlengin an vote tling chu lawmawm a tih thu a sawi a.

Mizo mipuite'n an chungah rinna an nghahzia lantirna a ni, a ti a. An beiseina tihlawhtling turin theihtawp an chhuah dawn tih a sawi.

MNF President Pu Zoramthanga chuan tun hma inthlan thlirin state-a rorel lai ZPM chu an party that vang ni loin a thli a tleh fuh rih a ni, a ti a. MNF-in vote Nuai chuang lai an hmu chu lawmawm a tih thu sawiin MP inthlan dang anga opposition tangrual ni se chak thei dinhmunah an ding, a ti a. Inthlan result-ah an lawm tih a sawi.

Pu Zoramthanga chuan inthlan lo awm zel tur thlirin MNF-in hma an sawn zel a beiseiawm, a ti a. State inthlanpui ni lo, AMC leh Local Council bakah VC inthlan te leh Autonomous District inthlan lo awm tur te chu ruling tan pawh chetsual awl tak a nih avangin eptu party tan pawh beiseina a awm a ni, a ti.

Congress President Pu Lal Thanzara chuan an candidate Pu Lalbiakzama vote-tu zawng zawng chungah lawmthu a sawi a; state inthlanah vote tam tak an hmuh bakah Central dinhmun thlirin an party-in nasa takin hma an sawn, a ti a. Mizoram Congress chuan Mizo hnam leh sakhua a him zel nan theihtawp a chhuah zel dawn, a ti.

BJP Mizoram President, Lok Sabha Candidate Pu Vanlalhmuaka'n campaign hun reilotea vote sang tak a hmu chu lawmawm a tih thu a sawi a; Mizo mipuiah BJP-in hma a sawn zel tih sawiin inthlan lo awm leh zel turah beiseina sang tak an nei tih a sawi.

Akashvani palai nen an inkawmnaah he thu hi sawiin Pu Vanlalhmuaka chuan Central-ah an sawrkar chu a lawmawm a, Mizo mipuiah BJP-in hma a sawn zel chuan inthlan lo awm zel turah phurna a pe tih a sawi a. ZPM Candidate Lok Sabha MP atana thlan tlin Pu Richard Vanlalmangaiha a lawmpui thu leh mipuiten duh taka an thlan avangin a chungah beiseina a sang hle a, Mizoram tana hmasawna hna thawk turin a duh tih a sawi.

ZPM-in a thu azira sawrkar laipuaia awn lam nei loa an insawi chungchangah Pu Vanlalhmuaka chuan a laiah a awm theih loh, a ti a. NDA lama an awm loh chuan INDIA an ni nghal tih sawiin tan lam nei lo anga an insawi chu mipui bumna mai a ni, a ti.

<><><>

LS ELECTIONEERING

Puan tawh thin angin Mizoram Lok Sabha member thlannaah hian kumin April ni 19 khan vote thlak a ni a. Polling Station 1,276-ah Vote Nuai 4 Sing 8 Sang 7 leh 103 a tla a. Mipa Nuai 2 Sing 4 Sang 1 leh 213 leh Hmeichhia Nuai 2 Sing 4 Sang 5 leh 800-in vote an thlak a, vote tla hi za zelah 56.87 a ni.

Mamit District-ah vote tla tha berin vote zaa 63.45 a tla a, Lawngtlai District-in dawtin vote zaa 63.37 a tla a, Khawzawl District-in dawtin vote zaa 59.76 a tla a. Serchhip District-ah zaa 59.09; Lunglei District-ah zaa 58.26; Kolasib zaa 57.02; Champhai-ah zaa 56.39; Hnahthial-ah vote zaa 56.06; Siaha District-ah zaa 55.07; Saitual-ah zaa 53.35; Aizawl District-ah vote tla chhe berin vote zaa 53.29 a tla a ni.

Mizoram pumah Counting Centre 13 ruahman a ni a. Aizawl District-ah Counting Centre 3 a awm a, District dang zawngah Counting Centre 1 theuh a awm baw a. Counting Hall 40 a awm a, heng Counting Hall-ah hian Counting Table 379 awmin vote chhiarna dawhkan tinah hian Counting Supervisor pakhat, Counting Assistant pakhat leh Micro-ObsERVER pakhat zel an awm a, vote chhiarna hmun hi ECI ruat Observer ten an vil a ni.

<><><>

AMC ELECTION CANDIDATES

Aizawl Municipal Corporation (AMC) Ward 19-na Corporator tur thlanna tun thla ni 25-a neih tur chuh turin MNF party Nomination Committee chuan Dr. Lalrinzuali Hrahse, Aizawl Kulikawn veng chu an ruat.

ZPM chuan AMC Ward 19-na inthlan chuh tur hian an party candidate atan Dr. C. Malsawmtluangi, Hlimen veng an ruat tih Thawhtanni khan an lo puang tawh a. Congress leh BJP te pawhin candidate neih an tum tih kan Corr. an hrilh a ni.

He inthlanah hian chuh tum te tan Municipal Returning Officer (Addl. DC Office, Aizawl)-ah naktuk, June ni 6 chawhma dar 11 leh chawhnu dar 3 inkarah Nomination Paper thehluh theih a ni a. Nomination form pawh he office atanga vek hian lakchhuah theih a ni a. Nomination paper te hi naktip June ni 7-ah endik a ni ang a, inhnukdawk duh tan June ni 10 chawhnu dar 1 thleng hun hawn a ni.

Aizawl Municipal Corporation Ward 19-ah hian Tlangnuam, Tlangnuam Vengthar, Kulikawn, Saikhamakawn, Melthum leh Hlimen te an awm.

<><><>

HOME DEPT. NOTIFICATION ON ARECANUT

Ram dang atanga dan phal loha kuhva lak luh a awm thin avangin Mizorama kuhva chingtuten an kuhva thar chhuah hralh kawngah harsatna an tawk tih hria-in Home Department chuan hmalakna thar a nei a.

Kuhva rahte hi Mizoram chhunga thar ngei a ni tih tichiangtu atan kuhva ching tamna district - Aizawl, Kolasib leh Mamit-ah te Certifying Officer ruat an nih thu thla hlui ni 27 khan tihchhuah a ni a. He hriattirna tihchhuahah hian Certificate of Origin pek chhuah dan tur leh he Certificate hman dan tur hi tarlan a ni a.

Certificate dilna hi kuhva rah chingtuten anmahni chinna hmun huamtu Certifying Officer-te hnenah thehluh tur a ni a. Certifying Officer leh staff ten dilna an dawn atanga hun remchang hmasa berah a hmunah, kuhva chingtu awm lai ngeiin an endik tur a ni a. Certificate an pekchhuahte hi vawikhat hralhchhuahna atan chauha hman theih a ni a. Certificate of Origin nei lo kuhva rah phurhte chu ram pawn atanga lak luh anga ngaih tur a ni ang a, man theih a ni ang. Certificate-te hi a dik loa hman a awm tih hriat a nih chuan certificate neitu chu criminal case siamsak theih a ni bawk ang.

<><><>

MASS RALLY ON CLEAN AIR

Vawiin Nilainia khawvêl puma lawm tur World Environment Day (WED) 2024 lawmna chi khat atân nimin zing kar khân Mizoram Pollution Control Board (MPCB) chuan ‘Mass Rally on Clean Air’ a buatsaih.

He hunah hian MPCB office-a hnathawkte bâkah sikul leh college eco-club thenkhat atangin zirlai leh zirtirtu thahnem takin kawng zawh pahin kawng dung leh luikawra bawlhhlawh chhar faiin hun an hmang.

He rally-a telte hi chhim lam Sikulpuikâwn leh hmar lam Chanmari Kâwn atanga chhuak tanin Vana Pa Hall kawtah an intâwk khâwm a, programme tâwitê buatsaih a ni a. Dr. Lalramnghaki Pachuau, Scientist ‘C’, MPCB-in kumin Worl Environment Day thupui ‘Leilung tihtui thar leh dan, ramngaw siama tràmpumpel dan’ a sawi a.

Mizoramah pawh ram chhia leh ram bua tam tak a awm tawh thu leh thenkhat chu khuarêl chhiatna avânga awm a nih piah lamah a tam zâwk chu mihring kutkawih vânga thleng a ni, a ti a. Ram leilung chhe mêk siamthaa a chhe zêl tur vênga ke pên chu mi tin mawhphurhna a ni, a ti.

He hun hmanga tel mi zathum chuang te chu nunphung thlâk danglam ngai te thlâk danglama chhehvêl humhim tura ke pên zêl turin an intiam a ni.

<><><>

ASSEMBLY

Andhra Pradesh Asembly bial 173 inthlan vote chhiar mekah Telegu Desam Party TDP ten hnehna an chan tawh leh hma an hruaina belhkhawm hi 130 a ni a, YSRCP in seat 19 ah hma hruaiin Janasena Party in 19 ah leh BJP in seat 7 ah hma an hruai a. Telugu Desam Party Chief leh Andhra Pradesh Chief Minister hlui N. Chandrababu Naidu chuan Kuppam Assembly constituency hma a hruai a. YSRCP candidate leh Chief Minister YS Jagan Mohan Reddy'n Pulivendula Assembly seat ah hma a hruai bawk a ni.

Hetihalai hian Odisha ah Assembly bial 147 ah BJP in seat an lak tawh leh hma an hruaina hi 71 a ni a, sawrkar lai Biju Janata Dal (BJD) in seat 61 ah hma an hruai thung a. Congress in bial 13 ah hmahruaiiin Independent in bial 2 ah leh CPI (M) in seat khatah hma an hruai a ni.

<><><>